

Sumiiffinni nunami aalajangersimasuni nunaminertanik atuinissamut akuersissuteqarluni takornariartitsisarneq Inatsisartut inatsisaannik nr. 19, 3. december 2012-meersumik tunngaveqartoq pillugu apeqquteqaat aallaavigalugu Inatsisartut oqallinnissaannik siunnersuut.

(Inatsisartunut ilaasortaq – Vivian Motzfeldt, Siumut)

Akissutitut allakkiaq

(Inuussutissarsiornermut, Suliffeqarnermut, Niuernermet Nunanullu Allanut Naalackersuisoq)

Naalackersuisut sinnerlugit Vivian Motzfeldt, Siumut matuminnga oqallinnissamik siunnersuuteqarneranut qutsavigissavara.

Takornariartitsinermik inuussutissarsiorfiup pitsaanerpaamik atugassinnissaanik, inuiaqatigiillu pitsaanerpaamik ineriartorfiunissaanik takornariartitsinermillu sapinngisamik annertunerpaamik iluanaaruteqarnissaanik qulakkeerinnissaq Naalackersuisunut aalajangiisuupput.

Takornariartitsinermut akuersissutit pillugit inatsisip siunertaa tassaavoq nunatsinnit aamma nunanit allanit aningaasaliisartunit takornariartitsinermik ingerlataqartunut aningaasaliissutinik noqqaaniarnermut qulakkeerinninniarnemullu sinaakktissanik pisariaqartunik pilersitsinissaq.

Oqallisissiami siunnersuuteqartup oqaatigaa takornariartitsinermik sulianut atuiffittut nunaminertanut atuinissamut kisermaassisusaatitaanermik nunanit allanit suliaqartut arlallit pissarsisimasut. Manna tikillugu eqalunniarnerup neqeroortiginissaanut takornariartitsinermi akuersissummik taamaallaat ataasiinnarmik tunniussisoqarsimasoq Naalackersuisut ilisimatitsissutigisinnaavaat, tassaavorlu Kujataani najukkami savaatilimmut tunniussaq. Siunissami qaninnerpaami eqalunnik sukisaarsaatigalugu aalisarnermut Qeqqata Kommunia akuersissuteqarfigisanik sumiiffinnik neqeroortitsissaaq.

Akuersissuteqarfittut sumiiffiit neqeroortitsissutiginerinut atatillugu inatsimmi kikkut akuersissutigisinnaanerannut erseqqissunik piumasaqaateqartoqarpoq – tassalu inummut ataatsimut imaluunniit suliffeqarfimmut tunngatillugit.

Najukkamut aallaaveqarnissamut piumasaqaateqarneq assut pingaartinneqarpoq. Neqeroortitsinermut atortussiat Namminersorlutik Oqartussat aamma kommunit pineqartut akornanni qanimut suleqatigiilluni suliarineqartut qinnuteqartumut makkuninnga nassuiaaqqusinernik erseqqissunik piumasaqaateqarput:

- Qinnuteqartup najukkamini suliffinnik qanoq pilersitsiniarnera, aammalu najukkami pilersuisartunik atuiniernera, taamaalilluni takornariartitsinermut akuersissummit tunniussami najukkami inuiaqatigiit iluanaaruteqartillugit.
- Kalaallit Nunaanni inuiaqatigiinni sulisorisat aamma ingerlatseqatigiiffiup tunngaveqarnera, aammalu Kalaallit Nunaanni takornariartitsinermik suliaqarnermi ilisimasaqarlunilu misilittakkat.
- Qinnuteqartup najugaqarfimmi suliffeqarfinnik pilersitserusussusaa pilersitsisinnaassusaalu, ilanngullugit:
 - Suliffeqarfimmik siulersuisoqarneq sulisorisanillu najugaqarfimmit inuttalikkat.

- Takornarianik nassuiaassisartunik kiffartuussinermilu sulisut sinnerinik najugaqarfimmit inuttaliineq.
- Sulisut pingaarutillit allat.
- Suliassiissutini, pilersuinerni aamma kiffartuussinerni najugaqarfimmit pilersuisunik atuinissaminut qinnuteqartup piumassuseqarnera, makku suliarinerini:
 - Assartuinerit ingerlassanillu aqutsinerit allat.
 - Nerisaqartitsineq, unnuiffissat taakkunungalu atasunik kiffartuussinikkut suliassat.
 - Atortunik, pequtinik assigisaannillu pisiortorneq.
 - Pingaarutillit allat.
- Najukkami/kalaallini suliffeqarfinnik inunnillu suleqateqarnissamut aammalu joint venturemik isumaqatigiissutinik atsiuinissamut qinnuteqartup piumasaqassusaa
- Takornariartitsinermik suliniummik najukkami inuiaqatigiit iluaqutaata sinneranik nukittorsaaniarluni qinnuteqartup iliuuserisassanik piviusunngortitserusussuaa.

Takornariartitsinermik akuersissuteqarnermut inatsisip nunami sumiiffimmi killilersukkami takornariartitsinermi suliarisamut kisermaassisinnaatitaanermik tunniussaqaarnermut atatillugu najukkamut aallaaveqarnissamut qulakkeerinninnissamut periarfissiivoq.

Takornariartitsinermik inuussutissarsiorfimmut akuersissuteqarnermut inatsisip neqeroorutaanera erseqqissarneqassaaq, tasaanani aatsaat akuersissummik peqaraanni takornariartitsinermik suliaqarnissamut piumasaqaat. Taamaalluni suli akuersissummik pigisaqarani takornariartitsinermik suliaqarnermik pilersitsillunilu ingerlatsiseqarnissamut periarfissaqarpoq.

Taamaattorli kisermaassisinnaatitsinermik akuersissutip nalunaaruteqarnermut periarfissaqarneq takornariartitsinermi namminersortut aningaasaleerusussusaannik annertusaanissamut tamatuma tungaviunera Naalakkersuisut isigaat. Taamatut kisermaassisinnaatitaanermik najukkami inuussutissarsiummik ingerlataqartut suliniutimik ineriartortinnissaanut akornusersorneqassanngillat, aningaasaliissutimik ernialersortinnissanut akornusersorneqaratik, minnerunngitsumillu kisermaassisinnaatitaanermik akuersissut nunat tamalaani niuerfiusumi takornariartitsinermik tunisassiaat tuninerani annertunerusumik naleqalersissallugu.

Ataatsimiinnermi matumani takornariartitsinermi periusissiaq nutaaq Naalakkersuisut saqqummiutissavaat, taanna ilaatigut Kalaallit Nunaanni tunngaviliinermik, nunanit allanit aningaasaliisussanik qulakkeerinninniarnermik, kiisalu nunap immikkoortuini ineriartortitsinermik sammisaqarluni. Kalaallit Nunaanni takornariartitsinerup inuussutissarsiutini napatitsisunngornissaa, aammalu siuarsarnermik suliffeqartitsinermillu siuarsaanissamut neriuartuutaasut atorneqanngitsut aallartisarnissaat periusissiap siunertarai.

Nunatsinnit aamma nunani allanit namminersortutut aningaasaliisartut takornariartitsinermik inuussutissarsiorfimmi pisariaqartumik ineriartortitsisoqarneranut tamakkiisumik aalajangiisuunerat Naalakkersuisut isumaqarput, taamaalluni Kalaallit Nunaata ineriartortuarneranik qulakkeerisussatut inuussutissarsiorfinni siuarsakkani takornariartitsineq ilaalissalluni.

Aalajangiisuvoq takornariartitsisartut tamarmik inatsisinik atuuttunik malinninnissaat, tamatumani aamma akileraarutsinik akitsuutinillu atuuttunik akiligassiissutigineqartunik akiliisarnissaat, nunatsinni inatsisit atuuttut naapertorlugit. Naalakkersuisut Akileraartitsisarnermut Aqutsisoqarfik aqqutigalugu tamanna eqqumaffigaat.

Qanittukku Tórshavnimi Vestnorden Travel Martimi peqataavunga, tasanilu nunatsinni takornariartitsinermik inuussutissarsiorfimmeersut amerlasuupilussuit naapippakka. Oqaatigineqartuartut tassarpiarput takornariartitsinermi akuersissutit nunatsinni suliffeqarfiit takornariartitsinermi tunisassiaasa ineriartorteqqinnissaannut sakkugisani pingaaruteqartuunerat. Assersuutigalugit eqalunniarluni sukisaarsaatit aalisarnerup, heliskiingip, uumasunik pisanik tammajuitsussanik piniarnermik aamma inuilaami misigisassat iluini akuersissuteqarfigisat takornariartitsinermi tunisassianik nunatsinnit suliffeqarfinnik siunissami neqerooruteqarsinnaasunik nunanit allanit niuertuusut aamma suleqatigisat assut soqutiginnipput. Akuersissutinik tunineqartarnerit tunngavigalugit suliaqartut arlallit millionilikkaanik aningaasaleerusussusillit piareersimapput.

Tamanna inatsisip akuersissutaasup siunertamut naleqqulluinnartuuneranut Naalakkersuisunut uppersaatissani annertunerpaavoq.

Taamatut oqaaseqarlunga Inatsisartut oqallilluarnissaat kissaappakka.

